

Hibando preservacion di nos historia oral n'e siguiente nivel

Minister Michelle Hooyboer-Winklaar cu elogio pa bunita iniciativa di Romulo Fingal

Cu presentacion di buki "Historia di Faro na Westpunt"

ROMULO Fingal tin un relacion sentimental hopi special cu California Lighthouse, nos faro na Westpunt. Como yiu di e ultimo vuurtorenwachter, el a realisa cu su edad ta subiendo y no tin hende mas pa conta e storia di e faro.

E ta conta cu e mes no por a kere cu e lo a skirbi un buki, pero na momento cu el a cuminsa pone su recuerdonan riba papel el a bay bon y ta contento di por a realisa e buki "Historia di Faro na Westpunt".

Cu asistencia di UNOCA, Romulo Fingal a lansa su buki e siman aki, para n'e lugar asina special pa cultura y historia di nos isla y unda cu recuerdonan di su infancia y hubentud a wordo crea.

Minister Michelle Hooyboer-Winklaar a expresa cu ta un honor y placer p'e ta presente na un ocasion asina special, cual ta hiba e preservacion di Aruba su historia oral n'e siguiente nivel. Ademá, e mandatario encarga cu Asunto Economico, Social y Cultura a comparti cu e lansamento di Romulo Fingal su buki ta un bon momento pa cuminsa concretisa e plannan pa restaura e faro.

E faro ta considera un di e monumentonan mas bishita pa nos turistanan, como tambe nos comunidad y e ta un di e lugarnan mas fotografia na Aruba. T'e deseo di Minister Hooyboer-Winklaar pa wak e faro restaura y pa nos comunidad y turistanan por disfruta di dje mas, cu nan por pasa paden y wak con e ta traha y disfruta di e bista for di su bentananan.

Yega na wak e restauracion di e Faro di Westpunt realisa ta un anhelo grandi di Romulo Fingal. El a splica cu ta papiando caba pa traduci su buki n'e idiomaan Ingles y Spaño, como



tambe Hulandes y cu loke resulta di e benta lo bay pa Fondo di Monumento pa contribui n'e mantencion di e monumento aki despues di su restauracion. Minister Hooyboer-Winklaar a menciona e simbolismo di un faro/lighthouse/vuurtoren, cual ta iluminacion y cu esaki speransa y guia; y cu nos Faro di Westpunt mester sirbi como simbolo di iluminacion, inspiracion y vision pa preservacion di nos cultura y cultura historico.

Romulo Fingal ta encurasha otro personanan cu a pasa den hopi cos durante nan bida y particularmente nan hubentud pa pone esakinan riba papel pa comparti esaki cu nos comunidad, specialmente "basta bo a biba y haci yen cos di mala mucha", el a bisa hariendo.

Minister Hooyboer-Winklaar a felicita Romulo Fingal cu e bunita buki cu ta duna un tiki di nos historia for di perspectiva di

un persona cu a biba banda di e faro y cu su famia a hunga un rol asina importante den e cuidu di e faro y nabegantenan den nos awanan teritorial.

E buki aki sumamente interesante y valioso y ta duna un bista den un parti di nos historia; e por wordo uza na nos scolnan y ta pas bunita den e proyecto pa preservacion di historia oral di Aruba.

A cuminsa cu e proyecto di preservacion di nos historia oral y ta di aplaudi cu un persona manera sr. Fingal a hiba esaki na e siguiente nivel, Minister Hooyboer-Winklaar a expresa. El a añadi cu e ta spera cu e buki di sr. Fingal lo sirbi como inspiracion pa otronan tambe contribui n'e cultura di Aruba y herencia cultural na un forma asina y ofrece obranan na Papiamentu, cual banda di nos obranan literario ta ofrece un bista den bida na Aruba.